



八二四

五

刻升菴南中集序

升菴者太史新都楊先生也南中者滇南也集著書也先生既適去滇南歲久留滯端居單省發憤著書神瑩理解垂文表義而撰述弘此編裁一而巳吾友少湄譚子先生之邦彥也取而刻之如古金石刻為告余曰吾刻子序然先生余不得見往余行縣亳州見薛西原言先生卓絕之才弘博之學其詩唐四傑不能過也余故知且好欲盡見所著書山川阻修雲霧塞之比得與譚子遊也因數問譚子見此編多於

薛處所見又喜其刻之如古金石焉故譚子告予曰
吾刻子序也刻中有序三篇大抵皆盡美品式自古
文辭傳到于今如三百篇及楚騷漢賦詎先注意品
式哉要之情成文耳情深文明虛浮靡曼深莫深于
發憤明莫明於感人高言逸響識曲聽真三復此編
當自得之矣智哉司馬子長識已往之作皆聖賢發
憤之所為也何謂來賢而弗然哉故先生發憤著書
明矣于是譚子以為道其情也

嘉靖二十四年十月河汾孔天胤序

楊升菴詩卷一

長樂郡
楊升菴

成都楊慎著

涉江采芙蓉

沉沉秋江水灼灼芙蓉花
葉葉凌清霜枝枝明朝霞
娟娟東鄰子采采惜芳華
昔時贈同心今日悲天涯
欲寄苦無因向風長嘆嗟

雙燕曲

有鳥名飛燕雄雌自相將
飲君王池水巢君文杏梁
美人當軒坐恐澹羅衣裳
請君驅除之君憐不忍傷

李詩下
并注并并
瑞地作瓊塊

雛生八九子嬌愛比鳳皇鳴聲何啾啾聞我庭東廂
習飛還不遠墮隊雙扉旁主人戒廬兒毛羽無摧戕
不啄五株桃不噉五畝梁秋風從西起翩翩向南翔
昔為黃口兒今為烏衣郎辭巢謝主人華屋恩難忘
願主壽千歲歲歲巢君堂

烏棲曲四首

金蓮作杵瑠瑰砧蛟龍艷錦鴛夾衾并州未剪燕霜
落何日征衣到沙漠

晝漏迢迢春灑灑草如柔蜀花如焰白日紅窓恨轉

浮言作強顏

多箇儂無計奈春何

汝南鳴雞烏白鳥強言饒舌催天曉粧相送淚闌
干月帳雲屏生曉寒

月華二八星三五丁丁漏水鼔鼔鼓相思相憶阻河
橋可憐人度可憐宵

宛轉歌

明河拂幌月樓簷驚鳥號林螢入簾美人遙夜歌宛
轉羅衣不襞宮黃淺愁聽更漏轉分明統統樓頭五
鼓聲

梁白紵舞歌

仙人六着帝臺棋高張洞越吹參差二八遞代三商
移含嬌吝彩闕容儀流雲不度華星遲鑪火九微鐙
九枝騰觚飛爵朱顏怡傳空引滿客忘疲滿堂不語
心相知

英英白紵雪色光機杼出自寒女房裁作舞衣雙袖
長吳娃魏粲自相將宛轉顧步雙鴛央儼若星月舒
其芒髮如結旌體如翔秋葍被風蘭裊香回身再拜
捧瑤觴千秋萬歲侍君王

燉煌樂

角聲吹徹梅花胡雲遙接秦霞白鴈西風紫塞皂鵬
落日黃沙漠使牧羊旌節闕氏上馬琵琶夢裡身回
雲闕覺來淚滿天涯

宮詞

天上佳人出北方能騎白馬射黃羊玉顏長在金輿
側咲指青山是妾鄉

寄毛用成

別後追酬送別詩石頭城裏是相思屢聞高議歸青

五言詩卷三
王甫
瑣爭頌新聲滿玉墀坐隱曾留王質斧好奇能寄李
邕碑嵩霞臺上頻南望冀北花開鴈去遲

夏雨

微涼生細雨半夜似新秋玉軫琴絲緩金爐香氣浮
簷花濺碎滴地鏡俯清流東閣多閑暇西池好唱酬

寒

天籟調寒吹神爐煉曉霜稍驚綿力薄還訝葉聲長
畫戟歸邊將青綾直省郎誰論萍氏禁須問麴生方

望西山

望西山西山迢遞慶霄間峰輝林彩如堪挹翠壁丹
梯若可攀亦有青鳥占紫氣還乘白鶴駐紅顏斗極
南陔分王氣天驕北漠控胡關近接橋陵鼎湖路太
乙勾陳臨玉樹遙瞻雙闕對氤氛葱葱鬱鬱捧瑞雲
潤接天河起箕尾根纏維絡鎮坤文長安樓閣中天
起峻極相連近天咫金芙蓉開萬井中罨畫屏張三
素裡龍宮鯨吼曉嵐青鳳城鴉宿烟光紫雪晴瓊岳
轉分明日映名都一何綺雪晴日映風光和陌上游
人積漸多相邀帝女柔桑路其奈王孫芳草何靜婉

香車褰翟弗嫖姚飛蓋擁盤陀楊柳千條金作線梨
花百葉玉為柯雕俎華筵分內苑錦塲繡野入平坡
行行國艷皆桃李處處塵香盡綺羅巨靈顛顛應相
避玄圃蕭條未許過別有青蓮千萬宇金榜紅墻圍
淨土錫卓多非漢代名翬飛各占周原膺橫玉行香
盡貴人揮金資福皆豪賈菩提花發六時閑吉祥風
動千鈴語海曇仙梵日供張鉢衣寶鬘時歌舞望山
竟如何由來逸興多朝回常拄笏休沐想鳴珂三月
春將謝未請遊山假痼疾在烟霞俗鞅繁晨夜閑人

真遂愛山情韋曲天西少送迎短屐踏莎占土脉葵
囊採韻賦春晴豈似神仙限官府愛山空作望山行

臘八日

御溝迴合咽冰泉宮樹霏微變冷烟丑應商春才八
日戌從漢臘已千年彩毫想繼銀鬕句玉燭仍稽寶
典篇隔戶車聲流水過却疑函鼓奏村田

出嘉陵江

嘉陵駛且長千里如投梭洋洋者綠水觸石揚白波
逶迤似有情相送出褒斜雲氣接江腦日色破浪花

冥冥下無極疑是神龍家垂藤飲獺濟淪棲陽阿
中有南行舟遙遙通三巴惜哉不可往巨石劇狼牙
我欲鑿安流手中無莫邪長歌行路難日暮猶天涯
紫石驛
夜火雙明紫石驛津鼓三搗白水江一片黑雲山際
起驚風飛雨入船窓

寄夏舜俞

山中睡起三竿日天上書來五弄木雲念我獨愁開
閒寂感君長跪謝殷勤兩年故國交遊冷千里同心岐

路分奇樹花滋看已徧不禁春色惱離羣

聖燈寺

寺中霜月之夕遠林葉墜
如一點燈僧云聖燈也

蒼烟叢裡聖燈紅火齊螢輝照遠空元是楓林秋葉
下露華光泫月明中

青橋曉發

遠客貪晨發三更夢已回江聲如驟雨吹到枕邊來

郟縣子雲閣

落景登臨縣郭西坐來結構與雲齊平郊遠見行人
小高閣迴看去鳥低林表餘花春寂寂城隅織草晚

萋萋酒闌却下危梯去猶為風烟惜解携

峽中

峽裡青山夢裡過曉來春比夜來多開蓬試看江頭
路樹樹殘梅照綠波

賦得劉郎浦送人

吳蜀成昏此水傍至今江浦號劉郎停橈過客休朝
詠不是朝雲感楚王

逢入京使

曉遇朝正使天涯絡繹來胡塵今已靜仙駕幾時回

積雪飄芳甸寒雲落古臺北征愁杜甫日暮獨徘徊

嶠關行

晨行嶠關道此道一何難曾陵高不極脩坂回鬱盤
季冬十二月時節正嚴寒馬蹄踐霜雪重轍帶岡巒
凌澌正堅洹河水無汎瀾通達結凍溜改徑陟噴坑
四望少烟火鳥路俯鴻磐悲風號古木響入玄雲端
居人盡塞向行者為槃跚野狼嘯昏侶飢鷹矯晚翰
迢迢村郭遠行行未解鞍凜凜歲方晏去去程猶寬
勞歌以詠志釋此越鄉嘆

揚升菴詩卷二

望中條

征馬長鳴向北風
峭關回首暮天東
太行過盡中條出
一路青山白雪中

望華山

白帝真源紫界封
金天削出翠芙蓉
高擎零露仙人掌
俯瞰明星玉女峰
陽壑春留千歲草
陰岩雪蔭四時松
頻年來往塵埃裡
敢向山靈問逸蹤

詠松明

棧道無燈燭松明採薛蘿霞光流板屋星星點散江波
壁上烟煤古風前香霧多長安炊桂者驚對此山阿
五丁峽舊傳為力士開山之地據史秦用張秦
司馬錯之謀以珎噐美女賂蜀侯而取之小
說迂怪傳疑可也遂賦此詩

峽形千仞立蒼顏開闢從來有此山自是美人傾絕
國不緣壯士啓重關蔡蒙早入梁州貢庸蜀曾陳牧
野間謠俗流傳難借問丹青遺籍尚班班

慶成宴次張惟信韻

太乙天壇望燿回九重春宴選辰開廣庭列坐瞻華
袞合殿飄香入玉杯海宇謳歌千載遇雲門隊舞八
荒來共傳彩筆飄飄賦獨有金門侍從才

羊皮彩燈屏

鴈足懸秦殿鯨膏朗魏宮何似靈籛鞞揚輝玄夜中
百琲添絢爛七采闢玲瓏洛洞金光徹東岳玉華融
雪毫羞耀日雲母詎障風白石望如近素絲看若空
青精千歲樹丹影五仙虹餘明如不惜還持繼燭龍
春郊得紫字張惟信同賦

韶景臨上春年華屬元巳晉楔首洛濱鄭風詠溱洧
渙川盈蕙蘭芳蹊陰桃李宛宛流文鶯斑斑響澤雉
園翹豐綠萸水葉牽玄沁百琲佳麗人千金冶游子
飛蓋雜英前行筵芳樹底席幙耀周緹絃服矜齊紫
野隰被華丹林籟和宮徵徙倚非送歸踟躕因望美
陌上君馬飢閨中妾蠶起晴颺颺鳴鞘香塵翼還軌
冲虛情已閑沉痾酒仍止請從張茂先清言洞名理

送鄧士魯給事謫官金壇

千里泛滄波孤蹤寄薜蘿風塵隨燕雀水國傍鼃鼃

湘浦捐春珮承明憶曉珂華陽雖咫尺未許聽仙歌

集弘法寺後圃小山

黃鳥語春晚青林生夏陰禪宮靜鍾梵寧知車馬音
率爾成嘉遇晤言良所欽對酒俯樓殿步屣陟丘岑
謀野既有獲在遠亦會心懷哉幽寂地茲遊可重尋
擾擾望城闈欲去愧塵襟

送高公次長洲尹

祖帳燕臺下官曹震澤東勞歌當曉日逸興對秋風
新水催飛鷁微霜度早鴻星躔牛斗近地脉海潮通

鄧令三年績韋郎五字工循良多暇日題詠繼文雄

即事

西風昨夜薊門過烽火遙連鴈尾河中使漠南傳漢
令將軍馬上奏燕歌寶刀金甲防秋近白草黃雲入
塞多聞道七旬資廟略會看一雨洗天戈

題竹

江南誰解寫琅玕後有仲昭前孟端自從文藻流傳
久轉覺丹青賞鑒難生綃一幅瀟湘出高堂六月冰
霜寒玉林深處人如玉欲往從之無羽翰

立春日對雪

天街晴雪照簾櫳萬戶千門似郢中先向曉營添朔
氣却隨春仗轉條風上林花信梅邊出太液波聲柳
外通翠水瑤池遊未遠白雲黃竹賦休工

右次陽峰
張崇象學

韻士

送杜汝弼之官景陵時有水患

景陵南去楚江深雲夢西連夏澤陰息壤萬家經歲
潦洪波千頃寄秋霖青楓曉失啼猿樹斑竹昏移宿
鳥林粒食更須懷衆口簿曹何以答羣心

簡溫民懷宮諭許于浣花別墅相招恐失佳約
作此戲簡

春來無伴訪烟霞
忽憶仙人在浣花
棋局幾時隨澗竹
釣船何處倚江沙
興憐隱浪金壺久
醉想臨風玉樹斜
舊日草堂君地主
還須折簡到山家

岷江行送郭魯瞻叅政

岷江江水西川西
靈源誰濬尋源迷
九州襟帶分千里
三峽崩騰會五溪
五溪三峽岷江委
濫觴宛轉方舟起
日夜朝宗向北溟
乾坤巨浸開南紀
北溟南紀

總滔滔灑灑侵雲赤
岷高蜿蜒青翰聯
越榜翻翻白鷺入
吳濤吾聞岷精通
井絡直帶星躔上
阿閣翹翹析木曉
成梁采采扶桑秋
未落錦袍仙客銀潢
槎青楓光彩照天涯
魚龍近避中流楫
鸞鶴遙迎東海家
海曲悠上隈江國
登殯騁望佳期隔
只言錦里異長風
不道青丘共明月
月明霜冷夢長安
江波此夜不勝寒
江頭天際歸舟處
定折相思寄澧蘭

次韻能尚弼詠寶光寺唐行宮遺礎

唐帝行宮有露臺
礎蓮幾度換春苔
軍容再向鸞叢

狩王氣遙從駱谷來萬里山川神駿老五更風雨杜
鵲哀始知蜀道蒙塵駕不及胡僧渡海杯

雨中劉潤之僉憲見訪

鳴雨虛堂六月秋高軒空谷遠相求佳期每憶同星
聚良會須為秉燭遊風磴雲端回白日水花烟葉亂
滄洲莫辭信宿陪孤賞更與江天散獨愁

恩波池別潤之

酌酒臨池水回船拂芰荷匆匆上馬去留興與烟波

早秋野眺寄所遲客

蟋蟀鳴歲晏爽鳩起涼氛斜川有名飲中林無雜羣
輕輪逐水曲空舫艤江濱烟杪散靈籟寒漪聚淥文
浦思滯淫客洲望夷猶君夢想期華月徘徊生碧雲
小山桂將結幽谷蘭當芬馨香坐消歇楚音詎相聞

揚升菴詩卷三

戊寅九日龍門山登高用唐人韻

江山盤踞千年地風雨崔巍百尺臺
搖落霜林秋籟發參差雲堞曉光開
四愁多阻張衡望九辨堪興宋玉哀
望遠登高聊自遣芳萸艷菊漫相催

赤岬山送別效謝靈運

茲山亘長江合沓氣象分朱壤凝炎德
光輝灼頰雯陽景有先曉陰霞遲餘曛
朝暮多奇態草木含靈氤既下鸞鶴侶
亦來麋鹿羣石床闕古蘚丹甃流烟瀆

遊屐久蕪沒仙跡空塵氛曰予敦玄尚偕子挹清芬
東嶠拾瑤草西岳采香芸行汎青衣水坐睇峨眉雲
躑躅守甍徑螿歎何當聞

冬晴三章

冬晴連月歲欲闌北陸脩影迴南巒行人喜舞農人
歡負耒杖策各自返過涉不愁溪水寒

岍梅春動江不波玉顏粲粲回鐵柯橘洲霜晚繁香
多吁嗟二物堪贈遠如此萬里關山何

岷山白日多光輝清江澄霧雪霰稀魚龍不蟄鴻雁

飛塞上將軍未解甲城南思婦夜縫衣

次韻劉潤之歲暮見懷

江曲橫烟遠樹低衡門榛草晚萋萋美人明月勞相
憶遊子浮雲夢不迷桂水舟航天塹北松州兵馬雪
峰西愁來擬對公榮酒醉裡放歌嚴氏溪

寒宵月色

明月流寒影低簷復轉廊雪霜留澹白參昴伴昏黃
野徑多樵笛江村有釣航不教烏鵲定直待燭龍光
九月三日見新月時有鼓盆之戚

纖纖初生月挂我高樓傍常時照歡影今夕流悲光
悲光正徘徊悵望相思臺涼沾露襟濕爽透風幃開
絲蟲繞階績火螢穿箔來更添漏水咽膏減缸花催
莊休歌不發潘仁心已摧商陵別鶴怨梁樹栖烏哀
未抵此時恨長嘯獨難裁

立春詠瓶梅

新春見早梅先折一枝來不待并刀剪何須羯鼓催
年光掌上出春色鬢邊回影泛金瓶水香留玉鏡臺
精神碎粉素零落惜瓊瑰情惹雲陽夢歌成郢雪才

佳人知愛重摘取泛霞杯

建林驛前有垂柳一株婉約可愛前年過之移

其幹植之家林今歲重見已復倍舊感賦一

首

枝枝金縷細葉葉翠條輕嫋嫋曾經折陰陰已復成
流鶯頻換曲征騎此重行不爲芳菲惜多緣歲月驚
烟絲縈水曲風絮惹山城閨怨佳人笛邊愁大將營
婆娑漢南意因見古人情

登金華山玉京觀懷陳子昂三首

石磴上盤雲仙家氣象分樓臺青靄出笙簫玉霄聞
飛鶴朝朝影栖鸞夜夜羣官衢纒咫尺人世隔塵氛

其二

巴嶠亭前立涪江檻外斜雪堂開洞府雲木上烟霞
葉響非關雨林香不是花玉京如可到從此問丹砂

其三

古調今寥落令人憶拾遺不圖垂拱世復覩建安詩
瑟在猶清廟碑殘尚色絲紫陽留詠後千載有鍾期
寄石季瞻赴臨安謫

聞道炎方謫遙從瘴海過後期淹歲月前路慎風波
霄漢孤鴻遠關門九虎多卜居何處問薜荔在山阿

巳卯九日登高

采采黃花不滿衣暝烟起望自朝暉馬卿病裡芳菲
晚宋玉愁邊節序非落木流波如有意來鴻去鴈故
相違消除強醉清樽酒歸掩田家白板扉

見梅花

一辭青瑣滄江卧山城二見梅花破正愛家家臨水
開還愁樹樹和烟墮清樽欲醉不成歡雪調空歌誰

與和小院迴廊日又斜高樓短笛風前過

避暑林亭

几席近漣漪枕簟依林樾琴聲歇流水扇影却明月
涼襟何道遙炎歎坐超忽

庚辰九日聞金鶴卿劉伯儒有彭門之會不克

奉陪作此代意

一別黃金萬里臺孤城三見菊花開雲移北闕霑恩
宴日遠南山獻壽杯抱病江天常闕寂關心時序獨
徘徊高人喜共登高會咫尺彭門阻一陪

梓潼道中

小市孤烟起平岡落日斜素林驚夕鳥錦石戴寒花
悵別關河晚憑高眺望賒上亭今夜月流影夢還家

早發解州

旅宿先鴉起歸心與鴈爭冰霜殘臘路花柳上春城
隱士嘲西笑騷人感北征勞生應物理奔走愧虛名

寄遠

濯錦江頭烟水綠相思萬里人如玉瑤琴別後不曾
彈今朝才理將歸曲

碧筒杯次懋昭韻

月戶星楹敞夜燈荷筒桑落共淹仍傾來細瀉珠盤
顆摘去愁空翠蓋層消渴涼生金掌露迎風寒瑩玉
壺冰三更促席歸何晚百罰深盃謝不能

送熊維藩之婺川

驪駒載道何駸駸飛鳧遙下蠻江潯鴻鴈不度梓柯
國虎豹常啼楓樹林鳴琴仙室白日靜鎖印公堂朱
夏深冰蘖肯移清吏節卉裳須服遠人心

送唐守之使朝鮮

玉馬朝周封壤舊青雲千呂瑞圖來鳳皇樓上星辰
動鴨綠江邊霧雨開王會千年輝簡竹

皇恩萬里被蒿萊張騫謾作尋源使陸賈虛當絕國
才

楊升菴詩卷四

離席行送彭二

昔子從軍巴蜀山橫戈千里何間關坐使麒麟日月
煥行收魚鳥風雲閑文武才名歸一姓兄弟勲華許
誰並起晚已謝時運傾當陽再覩乾坤正陟岡在原
來復返海水天風歲將晚行行白馬燕雪深飛飛黃
鵠秦雲遠離堂命酒羽觴疾畢昂盈軒月東出主人
留連客離席慷慨爲子歌今夕

至後雪

白雪晃玄陰清都帶玉岑原鱗春盎盎宮雉曉沉沉
朔氣龍沙遠寒光鴈渚深色裁班女扇聲入楚妃琴
黃竹當停奏幽蘭且罷吟瑤華如可贈持此慰離心
十二月朔旦候駕出南郊從唐体

天仗雲門外宵衣曉漏前蒼龍旂影動朱鷺鼓聲傳
星爛甘泉燭霜清泰時烟南郊新警蹕重觀孝皇年

禁直春寒

太乙祠燈罷甘泉薦鬯回青陽五月啓華殿上春催
温樹花全斂曲池冰不開通天明星館迎風寒露臺

清冷異塵境霄霓隔蓬萊玉女窺窓下金徒抱箭來
網戶排雲掩瑤墀映雪皚中郎五日直內史三宵陪
鄭綿猶重御越羅當未裁欲分青藜火共舉涿醴杯
送尹舜弼祗祀南嶽分韻得王字

洞庭環北渚衡麓奠南荒軒帝曾張樂重華舊陟方
登封非昔事秩禮自今王鸞掖馳仙使龍函捧御香
栢梁辭曉宴桂水泛春航星鳥光芒動風鳥浩渺揚
雲標青磴上天柱赤霄傍峰影回鴻鴈岡音下鳳皇
擗毫驚挾藻弭節敬維桑並命還分役同樓忽異翔

行行背去轍肅肅戒歸裝南望蒼梧遠西遊碧草長
五津通萬里七澤逸三湘暑殿螭頭日秋堂燕子涼
漢恩虛講幄唐會別文場離索難為久居諸幸不忘
于役江鄉言辭友生一首

祇命向南瀆離羣感西河英僚篤久要同聲鳴相和
廣筵開秩秩飛爵引僂僂披雲敷別藻揆日促淹珂
晨裝搖朔易夕駕極岷嶓旋軫陟駿原擊汰凌鴻波
流瀾玉輪汎杳靄青城阿丹誠薦蘊藻玄韻諧松蘿
臨睨自為美契濶誰云過游鱗樂靜渚迅翼懷安柯

興彼緬焉情陳此勞者歌

河橋篇寄用貞懋昭

渾河流水桑乾潮何年伐石駕長橋玄龜窟近填鳥
鵠滄海波平上赤霄尋源知近遠浩浩洪流滿平連
太液池迥接昆明苑帝里神臯紫氣中天江析木銀
潢通澗灑下洛應相並灞澹朝宗詎可同星傳雲槎
下城闕電逝飈馳交冀越橋外車音響若雷橋畔闌
干明似月可憐楊柳裊晴烟才見藏鴉又噪蟬東西
溝水分歧路南北烟霜感歲年沉璜使者辭芳甸聯

璧才人遙出餞別浦春沙漾穀文回淑秋濤收組練
飛蓋臨風緩去旌青門落日彩霞生懸知濯錦江邊
夢轉見盧溝橋上情

答程以道

驅馬國西門整駕城南端出宿指賓館飲餞臨河干
中道逢嘉友誰云行路難四海皆兄弟况是平生歡
贈我錦繡段珮之當衿鑿匣以膠與漆繪以芝與蘭
芝蘭芳不歇膠漆情無殫願為雙飛鳧隨君千里翰

錦城夕

錦波沉霽色丹樓生晚輝江光二流暝橋影七星稀
猶明叔度火未息文君機南陌駉駉度東城鍾漏微

新開嶺行

廢丘關前榛莽積新開嶺上烟嵐闢新途古道太多
岐暝色荒烟帶征客岩下寒江流水碧岩畔霜林楓
葉赤日暮畏行豺虎陌松燈昔火投孤驛北渚鳴鼉
應遠更南蠻哀猿響終夕

咸陽

帝里繁華歇神臯歲月多秦城依北斗渭水象天河

頽堞無遺土，驚川有逝波。丘陵沉霸氣，松柏起悲歌。

華清月夕

華清月華滿，清都玄景開。玉霜竟宇下，金波穿露來。
鴻濛澄寒霧，繚垣靜氛埃。蓮湯何窈窕，松嶺亦崔嵬。
景滅集靈殿，聲銷按歌臺。繁華自當歇，蕪沒誰興哀。
清光有今夕，欲去重徘徊。

行旅

行旅苦日短，勞人知路遙。忽忽歲云暮，客心中搖搖。
曠野饒寒氣，四望但寂寥。嚴霜下豐草，朔風鳴枯條。

浮雲起為蓋，堅冰結為橋。白日隱餘照，玄陰晦層霄。
鳴轂無停輪，嘶馬不解鑣。飛鳥夕知還，征途何迢迢。
無以慰苦辛，興言自成謠。

送周子庚都憲巡邊

肅肅戒嚴程，蕭蕭班馬鳴。龍庭新節制，騎省舊才名。
玉律調秋氣，金鏡寢夜聲。隴雲笳外結，關月笛中明。
鸞朔臨秦障，鶻觚繞漢城。沙汀行見鴈，海樹坐聞鶯。
游霧懷前賞，歸風遡別情。佇聽歌凱入，一舉塞垣清。

太華山歌送陳子學

五星墮地為五嶽金虎西南動芒角踐華為城類削
成云是巨靈之手斲三條鼎立當中央直與鴻濛奠
清濁太一終南培塿開洪河清渭繞行杯日華先照
蓮花上雲氣常從仙掌來高穿箭括通天路俯瞰明
星玉女臺冷然風馭不可駐降望大壑令心哀繡衣
柱史巖廊才入關玉節凌崔嵬搖山撼嶽下閭闔青
冥白日驅風雷奔軼絕塵巨萬里驄馬蹀躞無虺隤
君家老仙舊隱處丹爐石榻荒蒼苔登臨不問烟霞
侶但借神池一勺洗盡區中埃千仞峰端秋隼健題

書好寄西風回

送客

合樽且醉花間分襟易慘離顏朝下東風紫陌天涯
落日青山美人明月相望游子浮雲獨還愁見河橋
柳色勞歌一曲陽關

賦玉壺冰

雲送千峰雨風凝萬壑冰金莖先沈灑錦席失炎蒸
靈響自瓊瑤解仙膏水碧澄清冷浮綠蟻瀟灑絕青蠅
涼草虛疑挂寒菰定未勝何當却塵鞅赤脚踏雲層

中秋夕

月幌臨秋敞涼襟向夕輕鮮雲承倒影斜漢界空明
盧女流黃色班姬擣素聲含愁獨不見團扇若為情
送黃才伯用封南渭府

泛泛東行舟迢迢南渭流淪波環楚壤派別引昭丘
竹嶼臨湘烟楓門映灘日金節斗邊來青翰天上出
分珪剪桐邸鳴珂衣錦鄉江干旋露蓋海曲謝雲裝
西岬寒芙蓉東園折楊柳燕喜拜華堂鸞鳥謳獻春酒
握蘭五夜直采蕭三秋期跂予饑渴想遲爾瓊樹枝

送童士疇用封河南

西候臨周道南溟望楚雲恩綸三殿下瑞節五潢分
瞻洛詩先誦遊梁賦早聞神臯添藻思仙苑挹蘭芬
池遠鳳皇影江連鴻鴈羣歸程應計日陌上草初薰

南館對雪

玄霄有端木玉葉凌雲裁人間驚未見天上還先開
斜飄涼風館平覆露寒臺墻陰明紫界城隅淨丹埃
象廊光掩映鸞掖舞徘徊飛靈纒繞雷積霰忽成堆
三素綦邊瑩六花衣上來東閣觀梅興南宮視草才

薰鑪馥朝襍仙醞盈春罌書停柱下筆歌待郢中催
小春紅梅效徐庾體

風池冰未合雲林葉才凋小梅含紫萼踈英綴青條
飄香寒谷迥靜影月林遙絳雪明玄夜丹霞凝素朝
美人惜瓊樹纖手撫金翹剪綵添花蕊橫枝當綺寮
春杯酌鸚鵡夕幌啓鮫綃鮮粧呈粉艷醉頰湧紅潮
百和鑪烟歇九枝燈燄消窓通羅浮夢簾隔壽陽嬌
笛奏驚將落琴心弄未調芳華誰與惜秀色自孤標

送彭幸菴尚書致仕二首

司馬英名起弁髦元龍湖海信人豪洪源紫塞黃河
遠爽氣金天華嶽高裴度歸來惟縱酒廉頗老去自
遺橐林居紫燄光騰夜含景蒼精有賜刀

憶昔西征歌采薇雪山萬里駐駢駢總戎全蜀風雲
陣紀績成周日月旂諸葛蔓菁遺壁壘陶潛松菊舊
柴扉前賢出處真相似雅志如公兩不違

賦得流風回雪

春雲籠半晴春雪太多情神馳起玄朔仙靈飄紫清
軒墀颯以徧房櫳暖有聲宛轉逗香徑玲瓏穿綺楹

稍訝銅池淨俄看釵砌平沾梅粉臆動染柳翠稊驚
絃歌隨綽約巾舞鬪輕盈借問凌波浦何如不夜城

楊升菴詩卷五

酬夏于中

燕鴻凌雲翔越鷺向日熙同病每相憐同心常相思
與子共歲寒異縣同襟期驚風吹羽翼飄飄各何之
豈謂一分手復當嘉會時欣欣視顏色歷歷承微辭
明燈照几席清夜不知疲肯動南冠歎還歌北風詩
人生有聚散天涯多路岐各勉夙昔志庶用慰睽離

答彭子冲

異縣悲南國同車感北風霜清淮浦濶木落楚江空

危坂難回馬炎方少去鴻望歸天共遠惜別歲將窮
海曲飛鳴隔山梁飲啄同從軍古云樂況復九夷通

阻風曲鐘子磯作二首

峭石驚磯橫浦口朔風半夜蛟龍吼一枕波濤萬里
心江水客愁誰淺深

行人夜唱江南曲巴歛楚些遙相續聲聲怨暝復愁
更訴盡離情天未明

啼鴛峽口江流遠回鴈風前沙磧晚水驛梅花開未
開緘情千里寄陽臺

江陵舟中贈田李二鄉客

朗月寒沙夜未分玉簫金管醉中聞明朝回首沅江
路愁聽清猿和白雲

盤江行

可憐盤江河年年瘴癘多青草二三月綠烟生碧波
行人好經過

滇海曲十二首

梁王閣道水中央烏鵲雙星帶五潢跨海虹橋三十
里廣寒宮殿夜飄香

碧雞金馬古梁州銅柱鐵橋天際頭試問平滇功第
一逢人誰說潁川侯

化城樓閣壯人寰澤國封疆鎮兩關雲氣開成銀色
界天工斲出點蒼山

葉榆巨浸環三島益部雄都控百蠻神禹導河雙洱
水武侯征路七星關

沙金海貝出西荒桃竹撞華貢上方香象渡河來佛
子白狼槃木拜夷王

碣房草閣瞰夷庭側島懸崖控絕陁雞足已窮章亥

步鷲頭空入梵王經

孤戍平沙望大荒邊愁海思入蒼茫帝鄉東北仙雲
隔棘道西南媚景長

昆明池水三百里汀花海藻十洲連使者乘槎曾不
到空勞武帝御樓船

湖蕩魚蝦晨積塲市橋燈火夜交光油窓洞戶吳商
肆羅帕封頤棘婦粧

蘋香波暖泛雲津漁樵歌曲水濱天氣常如二三
月花枝不斷四時春

煮海醯郎暝漉沙避風估客夜乘槎雪浮粳稻壓春
酒霞嚼檳榔呼早茶

海濱龍市趁春雷江曲魚村弄晚霞孔雀行穿鸚鵡
樹錦鶯飛啄杜鵑花

華燈引琴思漢調

燭龍潛耀顧兔微金缸委照玄夜輝蘭膏吐燄芙蓉
歲熒熒火齊歎烟幾九枝絢爛虹九圍丹鯨樹鬢蟠
彩暈長明掃暈蛾停飛啼鳥聲緯璵瓏餘東山戎旅
吟伊威鳴梧高張黼低帷背壁抱影鼓思歸星翻漢

回海漏稀

刺桐花行

刺桐花惟嶺南及滇中有之異物志曰刺桐
即蒼梧嶺南多此物因以名郡滇中名鸚哥
花花形酷似之開以夏秋之交酒邊率爾命
篇云

刺桐花蒼梧樹瀟洒迎涼辰菴藹留炎暮渥翠掃蠻
烟飛英飄瘴霧蠻烟瘴霧雨餘天耀彩舒芳最可憐
紅欺鸚啄淺砂點鶴頭鮮連林千炬爛照水百枝然

星回節後流螢院乞巧樓前烏鵲筵邊候兩年通象
譯方隅萬里接龍編故鄉殊未返空園聊息偃一夕
復一朝傷離復傷晚環波海碣渺渺流干雲金碧層
層嘯汀際遙瞻柳渾洲隴坻長望張衡坂鉤陳閣道
紫微垣鳴鑿更珮列文軒建章東回下鵠沼甘泉西
對宿麟園金芝曄曄商飈起玉植青葱瑞露繁翡翠
叢中遊蝶鷓鴣黃葉底集雛鷄枝近上林全許借樹
高温室竟無言詎信長年悲落木誰憐遷客賦登瀛
歸去來定何日秋菊英天桂將實憇遽廬宴蓬蓽濁

酒田家醉不辭清纓漁父愁先失

惡氛行

金馬山前惡氛起虜馬來飲滇海水城西放火銀漢
紅炎燄塵頭高十里兩重日暈圍白虹萬家仰首呼
蒼穹相顧慘淡無顏色嗚呼寄命須臾中賊徒渾幾
箇枕戈臨水卧我軍屯北門分明不敢過土酋脅盟
來索官城上無言騎堞看父老倉忙雙涕泗細說去
冬尋甸事弦急柱促柄倒持首禍今朝竟何自堂堂
之陣誰主兵喁喁公等皆儒生賊來不肯令出哨賊

去但解擡空營豈無雄武士奮身思一決咫尺轅門
不肯前怒髮衝冠氣填咽况聞千金逐日費連月公
儲已傾竭土兵抄掠盡村園升天無梯地無穴熙皞
閭閻踰百年太平官府真神仙紫微迢迢華蓋遠虛
將敲朴威窮邊邊隅一旦紛解瓦喑鳴變作擎拳者
喑鳴擎拳兩奈何君不見建武年中任校尉又不見
開元年中張乾陀

垂柳篇

楚雄直方橋有垂柳一株婉約可愛往來過

之賦此志感

靈和殿前艷陽時忘憂館裡光風吹千門萬戶旌旗
色九陌三條雨露姿蒼涼死日籠燕甸縹緲宮雲覆
京縣芳樹重重歸院迷飄花點點臨池見臨池歸院
總仙曹應制分題競彩毫詔乘西第將軍馬詩奪東
方學士袍金明綠暗留烟霧舊燕新鶯換朝暮只知
眉黛為君顰肯信腰肢有人妬從此沉淪萬里身可
堪憔悴四經春支離散木甘時棄攀折荒亭委路塵
搖落秋空上林遠婆娑生意華年晚腸斷關山明月

樓一聲橫笛清霜坡

觀金潤甫壽亭侯廟畫壁歌

壽亭侯廟蒼山傍金生畫壁真擅場只今一百五十
載火旗雲馬神揚揚古來好手吾能說開元之中三
昧絕左衛將軍李思訓右承才子王摩詰金生動筆
師王李古法不墜空罕比何時放遣來滇水尋竒亦
過蒼山址乘興欵然掃素壁蛟龍抃舞長風起千年
戰功猶昨日颯爽英姿炯不死想見解衣槃礴時寂
寞後代覓心知蛛絲蟲網日凋壞賞者何人護者誰

翻嗟古來才士蕪沒亦何限感慨爲爾擊節生遙悲

春興八首

遙岑樓上俯晴川萬里登臨絕塞邊碣石東浮三絳
色秀峰西合點蒼烟天涯遊子懸雙淚海畔孤臣謫
九年虛擬短衣隨李廣漢家無事勒燕然

昆明初日五華臺草長鶯啼花亂開探禹穴遊今已
遂吊湘纍賦未須哀巢雲獨鶴時時下近水羣鷗日
日來散地幸容高枕卧清朝豈乏濟川材

諸葛提兵大渡津河流禹鑿迥如新彩雲城郭那無

跡黑水波濤亦有神象馬遠來銅柱貢犬羊不動鐵
橋塵靈關在眼平於掌歲歲蒲桃首宿春

憶昔衣冠侍帝庭常陪鸚侶翥仙冥張騫銀漢通牛
斗方朔金門隱歲星鳩鵲吟詩宮月白鳳皇傳詔御
烟青夢回彷彿鈞天奏腸斷蕭條海角亭

帝里朝辭供奉班客程宵濟洞庭灣湘靈鼓瑟清冷
外鮫女鳴機縹緲間青草波光連夢澤蒼梧雲物隔
疑山故園亦有岷江水垂老生涯釣艇閑

平沙落日大荒西獨立蒼茫意轉迷蕙晚蘭皋愁晚

對竹垣花掖記春樓摧頽杜甫歌朱鳳憔悴王褒望
碧雞白首艱難隨去住青雲容易隊攀躋

白屋茅堂枕碧沙玄亭亦近子雲家浣花溪裡花鏡
咲濯錦江中錦勝霞遊女秉芳歌窈窕狂夫題竹醉
橫斜悲來瘴海凋霜鬢愁聽山樓咽暮笳

天上風雲此際多山中日月竟如何爭傳鳴鳳巢阿
閣又見飛鴻出蔚羅宣室鬼神思賈誼中原將帥憶
庶頗難教遲暮從招隱擬把生涯學醉歌

江干行答禹山張愈光

吳王江干采芙蓉陳王洛浦賦遊龍忽驚繡帶香風
起漸覺羅裳珠露濃不緣織女星邊見定是嫦娥月
下逢逢君薦枕對襄王別君解珮悲交甫青雲幼窈
曼聲歌綠水迴環垂手舞鸞歌鳳舞無雙人燕歲鶯
年二八春百末蘭生延夕漏九華采燈爛晴晝金屏
花裡活秦宮寶帳香中隱韓壽迴黃轉紫返復間得
新捐舊須更後舊人顏色昔曾新新人恩愛行當舊
舊人紅袖泣前魚新人翠羽綴燕裾阿嬌怨賦金難
買蘇蕙回文錦不如濁水清塵坐長嘆空留可憐誰

相於

流螢篇

癸巳之夏卧疴三塔寺地多榛莽螢飛緯夕
感東山之詩及唐人之賦率爾操觚為流螢
篇

沉沉鴈沼鬱樓連隱隱龍宮熠燿然濛濛晴零雨東山
下颯轉薰風南陸邊可憐合暈輝玄夜可惜分華族
絳天絳天玄夜景微茫水簾銀床漏未央誰家院落
非天燭何處園林不夜光夜光灑露下天燭涼氛瀉

陰火遙穿翡翠簾流星近度鴛央瓦此時蟋蟀罷宵
征此際蛸蟾停涕聲長門團扇班姬闈阿房卷衣秦
后屏蘇婦下機粧不理卓女當壚酒半醒爲見流螢
思遠道爲感流年惜芳草暝看雙星炯不眠曉望長
河白如掃蕩心從軍向月支閨人對影滯秋期蠶書
宛轉連環字鴈帛殷勤織錦詩願得逢君拾光彩不
教賤妾歛愁眉

存歿絕句八首

何遜重泉別范雲清淚多他年淮隱處腸斷八公歌

右何仲默

章句傳燕國風流有薛君千年濠上意寂寂向誰云

右薛君采

東京崔子玉卧疾隔清漳天上青黎燭何人白玉堂

右崔子鍾

張公滄海客大雅起溟雲未許乘槎去蛟龍射斗文

右張愈光

碧雲停日暮華月照芳池夢回歌玉樹病渴憶瓊枝

右余懋昭

近有錢塘信斯人亦可傷更憐新特在猶喚舊江郎

右江景孚

一悵遼東鶴千年竟不歸夢魂回永夜相見是耶非

右劉汝楫

一疾緣醫誤孤蹤住世慵淚痕添沫水名字見峨眉峰

右安石公

夢中作宮詞

丙申秋七月廿四日

長信宮中夜未央班姬團扇畫秦王三更雲屋西風起翠粲紅羅滿玉霜

禹碑歌有序

禹碑在衡山絕頂韓文公詩云岫嶺山尖神
禹碑字青石赤形模竒科斗拳身薙倒披鸞
漂鳳泊挈虎螭事嚴跡閱鬼莫窺道士獨上
偶見之我來咨嗟涕漣漉千搜萬索何處有
森森綠樹徠徠悲詳詩語始終公蓋至其地
矣未見其碑也所謂青字赤石之形模科斗
鸞鳳之點畫述道士口語耳若見之矣發揮
稱贊豈在石鼓下哉迨宋朱張同遊南岳訪

求復不獲其後晦翁著韓文考異遂謂衡山
實無此碑反以韓詩為傳聞之誤云再考六
一集古錄趙明誠金石錄鄭漁仲金石略之
三家者古刻曠列無遺獨不見所謂禹碑者
則自昔好古名流得見是刻者亦罕矣碧泉
張子得墨本於楚持以貺予予撫卷而嘆曰
嗟乎韓公所謂事嚴跡闕者信夫不然何三
千餘年而完整無泐如此何昔之晦何今之
顯晦者何或翳之顯者何或啓之天壽珍物

神飫吾嗜不必以生世太晚為恨也已作禹
碑歌以紀之雖不足以影響昌黎然而繼絕
表微固亦公之雅意乎

神禹碑在岫巖尖祝融之峰凌朱炎龍畫傍分結構
古螺書匾刻戈鋒銛萬八千丈不可上仙扃靈鑰幽
以潛昌黎南遷曾一過紛披芙蓉塞水簾天柱夜瞰
星斗下雲堂朝見陽輝遲追尋夏載赤石峻封埋古
刻蒼苔黏拳科倒薤形已近鸞漂鳳泊辭何織墨本
流傳世應罕青字名狀人空瞻水叔明誠及浹滌集

古金石窮該兼貯列箴銘暨欵識橫陳盱眙和釜鬻
胡為至寶反棄置捃撫磨蟻捐烏蟾又聞朱張遊岳
麓霽雪天風影佩檐搜竒索秘跡欲徧春倡撞和詩
無厭七日崎嶇信有覲一字膏馥寧忘括非關喘嶮
阻登陟定是藤葛籠窺覘好古予生嗟太晚拜嘉君
貺情深忭老眼增明若發覆尺喙禁斷如施箠七十
七字挈螭虎三千餘歲叢蛇蟒憶昔乾坤漏息壤蕩
析蒸庶依苓樛帝嗟懷襄咨文命卿佐洛洞分憂悵
洲并渚混沒營窟鳥迹獸迹交門簷竭來南雲又北

夢直罄西被仍東漸黃熊三足變鮫服白狐九尾歌
麗裊後乘包湖受玉籙前列温洛呈疇臯永奔竄舞
那辭胝平成天地猶垂謙華岳泰衡祗鎮定鬱塞昏
徙逃喁噉文章絢爛懸日月風雷呵護環屏黔君不
見周原石鼓半已泐秦湫詛楚全皆殲此碑雖存豈
易得嶂有嵐靄峰堪巘足音夔絕柱藜藿手影颯瑟
森櫛栴湘娥遺佩冷斑竹山鬼結旗零翠斂造物精
英忌洩露祗恐羽化難留淹欲摹拓本鑄崖壁要使
好事傳細繡著書重訂琳琅譜裝帖新耀瓊瑤籤麝

煤輕翰蟬翅榻煩君再寄西飛鷁

門人丘文舉

李世芳

楊富春集錄



